

दिनांक 21.03.2024

समय: 18.45 बजे

नमस्कार

आकाशवाणी जयपुर-अजमेर
प्रादेशिक समाचार

- सुप्रीम कोर्ट मुख्य निर्वाचन आयुक्त अर निर्वाचन आयुक्तां री नियुक्ति ऊं जुड्या नुवा विधान माथे रोक लगावण ऊं नट्यो।
- डॉ. विनय सहस्त्रबुद्धे भाजपा रा नुवा प्रदेश चुनाव प्रभारी बणायी ज्या-पैली वाळा विधायक प्रहलाद गुंजल कांग्रेस मांय भेळा व्ह्या।
- होळी ऊं पैली प्रदेश रा न्यारा-न्यारा मिंदरां मांय अर दूजी ठौड़ां फागोत्सव रा आयोजन।
अर
- राज्य मांय घणखर ठौड़ां दिन मांय हल्की गर्मी रो एहसास व्हेवण लाग्यो-आवता दिनां पारो और चढबा रा आसार।

000

सुप्रीम कोर्ट मुख्य निर्वाचन आयुक्त अर निर्वाचन आयुक्तां री नियुक्ति ऊं जुड्या नुवा विधान माथे रोक लगावण ऊं नट ग्यो है। न्यायमूर्ति संजीव खन्ना अर न्यायमूर्ति दीपांकर दत्ता री पीठ कह्यो के लोकसभा चुनाव करीब है अर विधान माथे रोक नी लगायी जा सके है। इण ऊं जुडी अर्जी री सुणवाई करता थकां अदालत कह्यो के नुवा बणायी ज्या निर्वाचन आयुक्तां ज्ञानेश कुमार अर सुखबीर सिंह संधु रे खिलाफ कोई आरोप नी है।

000

निर्वाचन आयोग भरमावण वाळी जाणकारियां ऊं सावचेत रेहवण बाबत् कह्यो है। आयोग सियासी पार्टियां ऊं किण ई भांत री जाणकारी जनता ताई पूगावण ऊं पैली वां री जांच करण सारू कह्यो है।

000

लोकसभा चुनाव ने ध्यान राखता थकां भारतीय जनता पार्टी राष्ट्रीय कार्य समिति रा सदस्य डॉ. विनय सहस्त्रबुद्धे ने प्रदेश रा चुनाव प्रभारी बणाया है। राज्य मांय लारला साल रा आखिर मांय व्ह्या विधानसभा चुनाव मांय केंद्रीय मंत्री प्रहलाद जोशी ने प्रदेश का चुनाव प्रभारी बणायी ज्या हा, पण अब प्रहलाद जोशी कर्नाटक मांय धारवाड़ सीट ऊं लोकसभा चुनाव रा उम्मीदवार है। ऐड़ा हालात मांय संगठन मांय काम करण रो अनुभव राखण वाळा डॉ. विनय सहस्त्रबुद्धे ने राजस्थान मांय प्रदेश चुनाव प्रभारी बणायी ज्या है। वां सागे विजया राहटकर अर पैली वाळा सांसद प्रवेश वर्मा ने प्रदेश रा सह-प्रभारी बणायी ज्या है। ई सागे ई प्रदेश भाजपा रा आला नेता अर पार्टी रा पैली वाळा प्रदेश अध्यक्ष सतीश पूनिया ने भाजपा री हरियाणा इकाई रा प्रदेश चुनाव प्रभारी बणायी ज्या है।

भारतीय जनता पार्टी रा नेता अर पैली वाळा विधायक प्रह्लाद गुंजल आज कांग्रेस मांय भेळा व्हे गया। वां ने आज कांग्रेस रा प्रदेश कार्यालय मांय राज्य रा पैली वाळा मुख्यमंत्री अशोक गहलोत अर पार्टी रा प्रदेश अध्यक्ष गोविंद सिंह डोटासरा री मौजूदगी मांय कांग्रेस री सदस्यता दिरायी ज्यी। ई मौके पार्टी रा प्रदेश अध्यक्ष गोविन्द सिंह डोटासरा कह्यो के पार्टी रा प्रदेश स्तर रा नेतावां सागे बातचीत पाछे गुंजल ने कांग्रेस मांय शामिल करण रो फैसलो करी ज्यो। कांग्रेस मांय भेळा व्हेयां पाछे गुंजल कह्यो के वे जमीनी स्तर माथे चाळीस साल तांई भारतीय जनता पार्टी सारु काम कीनो, पण पार्टी वां री तपस्या री कद्र नी कीनी। गुंजल सागे नरेश मीणा अर कुछ और नेता ई ओजू कांग्रेस मांय शामिल व्हे गया।

डाक रे जरिये वोट देवण वाळां रा सुबीता सारु निर्वाचन आयोग री ओर ऊं एक सुविधा पोर्टल 'पोस्टल बड्डी' बणायी ज्यो है। ई पोर्टल रे जरिये डाक मतपत्र रे जरिये वोट देवण बाबत् अर्जी देवण ऊं ले र वोट देवण रो काम पूरो व्हेवण तांई री ऑनलाइन तरीका ऊं निगराणी करी जा सके है। मुख्य निर्वाचन अधिकारी प्रवीण गुप्ता आज ई पोर्टल री सुरूआत कीनी। ई मौके वे कह्यो के इण ऊं 'कोई भी मतदाता न छूटे' री सोच ने और ताकत मिलेला। वे बतायो के ई पोर्टल रे मार्फत घणी जरूरी सेवावां मांय लाग्योडा कर्मचारियां, घर ऊं वोट देवण रा पात्र बुजुर्गां अर दिव्यांग मतदातावां अर चुणाव रा काम मांय लाग्योडा कर्मचारियां ने पोस्टल बैलट रो सुबीतो और आसानी ऊं मुहैया करायो जा सकेला।

ई बीचे प्रदेश मांय आज कोई पर्चो दाखिल नी करी ज्यो। राज्य मांय लोकसभा चुनाव सारु हाल तांई दो नामपाना दाखिल करी ज्या है, ज्यां मांय एक-एक पर्चो जयपुर अर जयपुर-ग्रामीण लोकसभा हलका सारु दाखिल करी ज्यो है।

लोकसभा चुनाव मांय बत्ता ऊं बत्ता मतदातावां मांय वोट देवण सारु जाग जगावण बाबत् सूचना अर प्रसारण मंत्रालय रा केंद्रीय संचार ब्यूरो री ओर ऊं न्यारा-न्यारा कार्यक्रम राख्या जा रह्या है। **सवाईमाधोपुर** मांय ब्यूरो री ओर ऊं वोट देवण री न्यारी-न्यारी प्रक्रियावां री जाणकारियां दी जा रही है। सिरोही जिला री पिंडवाड़ा पंचायत समिति रा नांदियां अर जनापुर मांय केंद्रीय संचार ब्यूरो री ओर ऊं संगोष्ठी, प्रदर्शनी, शपथ, प्रश्नोत्तरी, पोस्टर होड़ अर स्वीप आकृति री मानव श्रृंखला बणा र वोट जरूर देवण री अपील करी ज्यी। **हनुमानगढ** मांय स्वीप गतिविधियां रा तहत आंगनबाडी केन्द्र मांय मेंहदी माण्डण री होड रे जरिये महिला मतदातावां मांय वोट देवण बाबत् जाग जगायी ज्यी। **डूंगरपुर** मांय ई नेहरू युवा केंद्र अर जिला प्रशासन री ओर ऊं वोट देवण बाबत् जाग जगावण रा मकसद ऊं न्यारा-न्यारा कार्यक्रम राख्या जा रह्या है। जिला रा सागवाड़ा मांय पुलिस अर बी.एस.एफ़ रा जवान पलैग मार्च निकाळ र जनता ने बिना डर वोट देवण रो भरोसो दिरायो। मार्च रे दौरान पुलिस अर बी.एस.एफ़ रा जवान 26 अप्रैल ने बत्ता ऊं बत्ता मतदातावां ऊं वोट देवण री अपील कीनी। **बाड़मेर** मांय जिला निर्वाचन अधिकारी निशान्त जैन आज हस्ताक्षर अभियान सरु कीनो अर बत्ता ऊं बत्ता मतदातावां ऊं वोट देवण री अरज कीनी। **बारां** मांय मतदाता जागरूकता सारु चलाया जा रह्या स्वीप कार्यक्रम रा तहत जिला निर्वाचन अधिकारी कलक्ट्रेट परिसर मांय सेल्फी प्वाइंट रो उद्घाटन कर र सगळां ऊं वोट देवण री अपील कीनी। **चित्तौड़गढ** मांय फागोत्सव कार्यक्रम रे दौरान महिलावां ने बिना डर्यां वोट देवण री

शपथ दिरायी ज्यी। नागौर मांय ज़िला प्रशासन वोट देवण बाबत् जाग जगावण अर स्वीप गतिविधियां चलावण सारु गैर-सरकारी हलका री एक सीमेंट कंपनी सागे करार कीनी है।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो।

चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है सिरोही जिला रा राजपाल सिंह रो संदेश -

000

मुख्यमंत्री भजनलाल शर्मा आज कोटा मांय भाजपा रा कोटा, झालावाड़ अर भीलवाड़ा क्लस्टर रा कार्यकर्तावां री मीटिंग मांय सिरकत कीनी। ई पाछे वे क्लस्टर री कोर कमेटी री मीटिंग ई लीनी।

000

होळी रो त्यौहार नजदीक आवण सागे ई फागोत्सव रा कार्यक्रमं री धूम लगातार बध रही है। जयपुर रा आराध्य देव गोविन्द देव जी मंदिर मांय ई राख्या जा रह्या फागोत्सव मांय मोटी तादाद मांय जातरु सिरकत कर रह्या है। राज्यपाल कलराज मिश्र ई आज गोविंद देव जी मंदिर मांय पूजा-अर्चना कर र प्रदेश री जनता री खुशहाली री कामना कीनी अर फागोत्सव मांय सिरकत कीनी। भरतपुर मांय ई पर्यटन विभाग अर जिला प्रशासन री ओर ऊं मणायी ज्या ब्रज होली महोत्सव रा तैत न्यारी-न्यारी होड़ां अर सांस्कृतिक कार्यक्रम राख्या ज्या। झालावाड़ रा द्वारकाधीश मन्दिर मांय ई मंगला आरती पाछे जातरु भगवान द्वारकाधीश सागे फूलां अर रंग-गुलाल ऊं होळी खेली। बूंदी मांय फागोत्सव रा तैत लोग मंदिरां मांय भगवान सागे होळी खेलता निजर आ रह्या है। पेश है म्हाणा खबरनवीस री रपट-

000

थळी हलका मांय जैव विविधता बणायी राखण सारु जोधपुर जिला रा सेतरावा गांव मांय फ्रांस ऊं आया दल री ओर ऊं केर, कुमठिया अर खेजड़ी रा बारा मांय शोध कर्यो जा रह्यो है। पेश है म्हाणा खबरनवीस री रपट-

000

प्रदेश मांय पारा मांय उतार-चढ़ाव रो दौर हाल ई चाल रह्यो है, हालांकि घणखर ठौड़ां दिन रो तापमान 32 ऊं 39 डिग्री सेल्सियस बीचे दर्ज कर्यो जा रह्यो है। ई कारण दिन मांय गर्मी रो अहसास व्हेवण लाग्यो है। बाड़मेर मांय आज दिन मांय 39 दशमलव 2 डिग्री सेल्सियस तापमान दर्ज करी ज्यो। रात री बगत ई पारो चढ़बा लाग्यो है। लारली रात फलौदी मांय कमती कम तापमान 25 डिग्री सेल्सियस दर्ज करी ज्यो। जयपुर, जैसलमेर, जोधपुर, बीकानेर अर डूंगरपुर मांय ई कमती कम तापमान 20 डिग्री सेल्सियस ऊं ऊंचो दर्ज करी ज्यो। ई बीचे झालावाड़ ज़िला मांय दोपहरां पाछे बादळा मण्ड गया। मौसम विभाग रे मुजब राज्य मांय आवता दिनां पारो और चढ़बा रा आसार है।

000

होली रा त्यौहार ने ध्यान राखता थकां जयपुर पुलिस कमिश्नरेट रा न्यारा-न्यारा पुलिस उपायुक्तां अर जयपुर ग्रामीण रा एस.पी. ने सांप्रदायिक सौहार्द्र, कानून व्यवस्था अर आवण-जावण री व्यवस्थावां समेत जरूरी इन्तजामात करण अर लगातार निगराणी राखण रा हुकम दिया ज्या है। जयपुर ग्रेटर नगर निगम अर जयपुर हैरिटेज नगर निगम ने ई होळी अर धुलण्डी पाछे बत्ता कर्मचारी लगा र साफ-सफाई करावण अर हिफाजत सारु दमकल गाड़ियां तैनात करण बाबत् कही ज्यो है।

000

